

DAGING AWIG-AWIG	ii
MURDHA CITTA	1
PRATHAMAS SARGAH ARAN LAN WEWIDANGAN DESA	2
DWITĪYAS SARGAH PATITIS LAN PAMIKUKUH	3
TRTĪYAS SARGAH SUKERTAN TATA PAKRAMAN	3
Palet 1 Indik Krama	3
Palet 2 Prajuru lan Dulun Désa	7
Palet 3 Indik Kulkul	10
Palet 4 Indik Paruman	11
Palet 5 Indik Druwén Desa	13
Palet 6 Indik Panyanggran Krama Banjar ...	14
CATURTHAS SARGAH SUKERTAN TATA AGAMA	15
Palet 1 Indik Dewa Yajnya	15
Palet 2 Indik Resi Yajnya	19
Palet 3 Indik Pitra Yajnya	19
Palet 4 Indik Manusa Yajnya	24
Palet 5 Indik Bhuta Yajnya	24



PANCA AMAS SARGAH	SUKERTAN TATA PAWONGAN	26
	Palet 1 Indik Pawiwahan	26
	Palet 2 Indik Nyapihan	27
	Palet 3 Indik Sentana	27
	Palet 4 Indik Warisan	
SASTIAS SARGAH	SUKERTAN TATA PALEMAHAN	28
	Palet 1 Indik Karang, Tegal, lan Carik	28
	Palet 2 Indik Pepayonan	29
	Palet 3 Indik Wewangunan	30
	Palet 4 Indik Wewalungan	30
	Palet 5 Indik Bhaya	31
SAPTAMAS SARGAH	WICARA LAN PAMIDANDA	32
	Palet 1 Indik Wicara	32
	Palet 2 Indik Pamidanda	33
AṢṬAMAS SARGAH	NGUWAH-UWUHIN AWIG-AWIG	35
NAWAMAS SARGAH	PAMUPUT	35
LEPIHAN	TETINASAN NYĀSA LAN SASANTI	37

MURDDHA CITTA

OM AWIGHINAM ASTU NAMO SIDDHAM

Sembah bakti miwah pangastawan titiang majeng ring paduka Bhatara- Bhatari sesuwunan titiang sami, riantukan wantah malarapan panghyangning kalih paswécan Ida Sang Hyang Widhi Wasa asung kretawaranugraha nyresti jagat jangkep rawuhing sadagingnya sami, mawinan wénten kahuripan sekala niskala ring Bhuwana Agung miwah ring Bhuwana Alit. Manut dresta, Désané kamanggehang dados pasayuban Krama Désa rawuhing kulawarga pawongannya sami, mawastu raris Désané kamanggehang pinaka pawakan Bhuwana Agung, pawongannya kamanggehang pinaka pawakan Bhuwana Alit.

Sotaning pawakan Bhuwana Agung, Désané taler kamanggehang pinaka pawakan bhāwa mahurip, sané kacirénin antuk wéntené pakilit Tri Hita Kāraṇa sané tan dados pasahang, luwiré :

- ha. Parhyangan, inggih punika : sahanan parhyangan panyiwian Désa, genah ngarcana bhāwan Ida Sang Hyang Parama Wiśéṣa, pinaka jiwa pramanan Désané;
- na. Pawongan, inggih punika : gebogan Krama rawuhing warga Désa maka sami pawakan Tri Kaya pinaka bāyu pramāṇan Désané, mawinan Désané prasida maolah prawretti;
- ca. Palemahan, inggih punika : sahananing pakarangan, tegal, carik, miwah sétra sakekuwuban Désa Pakraman, pinaka sthūla sariran Désané.

Adung patemoning Bhuwana Agung ring Bhuwana Alit, maka larapan ngupadi śānta jagaddhita, punika sinanggeh murddhaning prayojana pangriptaning awig-awig iki, rikala paséban mami Krama Désa Pakraman Tohjiwa pinaka sepat siku-siku pamatut miwah pamutus, wastu kasidan prayojanan mami kabéh, prasama angidep muwah amagehaken linging awig-awig kadi ring sor iki.

PRATHAMAS SARGAH
ARAN LAN WEWIDANGAN DESA

Pawos I

- (1) Désa Pakraman puniki mawasta Désa Pakraman Tohjiwa.
- (2) Jebar kekuwub wewidangannya mawates nyatur désa :
 - ha. Sisi wétan : Désa Pakraman Mayungan;
 - na. Sisi kidul : Désa Pakraman Antapan;
 - ca. Sisi kulon : Désa Pakraman Juwuklegi;
 - ra. Sisi lor : Désa Pakraman Mayungan.
- (3) Jebar kekuwub wewidangan sané mawengku antuk wates-wates inucap ring ajeng, wénten 337, 50 Ha.
- (4) Sané kamanggehang ngranjing dados kekuwub wewidangan Désa Pakraman puniki, manut dresta, luwuré :
 - ha. Pupulan karang paumahan sané sinanggeh Palemahan Désa Pakraman;
 - na. Sétra, carik miwah tegal sané wénten ring kekuwub wewidangan Désa Pakraman puniki sajabaning Palemahan Désa Pakraman, manggeh ngranjing dados Telajakan Désa Pakraman Tohjiwa.
- (5) Awig-awig, Pararem miwah sahanan Pasuaran Désa, manggeh kajejerang ring jebar kekuwub wewidangan Désa Pakraman puniki sami.

DWITĪYAS SARGAH
PATĪTIS LAN PAMIKUKUH

Pawos 2

Désa Pakraman Tohjiwa, ngamanggehang pamikukuh, minakadi :

- (1) Pancasila.
- (2) Undang-Undang Dasar 1945.
- (3) Tri Hita Kāraṇa, manut sadācara Agama Hindu.
- (4) Hak Azasi Manusia utawi HAM.
- (5) Perda Provinsi Bali, indik Désa Pakraman.

Pawos 3

Luwir Patitis Désa Pakraman Kambangan :

- (1) Mikukuhin miwah ngrajegang Sang Hyang Āgama.
- (2) Nginggilang tata prawrettiné maāgama.
- (3) Ngrajegang kasukertan Désa saha Pawongannya sekala lan niskala.

TRTĪYAS SARGAH
SUKERTAN TATA PAKRAMAN

Palet 1

Indik Krama.

Pawos 4

- 1) Sahananing sang jenek mapaumahan ring wewengkon wewidangan Désa Pakraman Tohjiwa, sinanggeh warga Désa.
- 2) Warga Désa inucap ring ajeng, linggihnyané wénten 3 (tigang) soroh :

- ha. Warga Désa sané maagama Hindu tut sareng nyungkemin Kahyangan Désa Pakraman Tohjiwa, sinanggeh Krama Désa Pakraman Tohjiwa,
- na. Warga Désa maagama Hindu sané wantah nyarengin ring Pawongan miwah Palemahan kéwanten, sinanggeh Krama Tamiu, sané kasulurang manut pararem.
- ca. Warga Désa boya maagama Hindu sané wantah nyarengin ring Palemahan kéwanten, sinanggeh Tamiu sané kasulurang manut pararem.

Pawos 5

Dasar Pakraman :

- (1) Sahanan Warga Désa sané sampun marabian, patut ngawit dados Krama Désa.
- (2) Satunggil Krama, manut karendahan kulawargannya, patut keni sinalih tunggil ayah-ayah :
 - ha. Ayahan Ngarep;
 - na. Ayahan Balu;
 - ca. Ayahan Panglé.
- (3) Sesengker ngawit tedun ngayah :
 - ha. Marep ring Krama Désa sané mawit saking pawiwahan asasih saking puput makala-kalaan;
 - na. Marep ring Krama Désa sané mawit saking ngarangin sané sareng makrama désa, kasulurang manut pararem.
- (4) Krama Désa sané wenang nyada yan sampun kapastika, luwiré :
 - ha. sungkan tahunan;
 - na. yan sampun madrebé pangentos / panyeladii;
 - ca. risampun mayusa 65 warsa.
- (5) Sang saking séwosan désa yan sareng tedun makrama désa ring ring Désa Pakraman Tohjiwa, patut keni batu-batu utawi pamogpog, sané agengnyané kasulurang manut pararem.
- (6) Yan wénten krama saking séwosan désa sareng ngranjing makrama désa ring Désa Pakraman Tohjiwa, patut kadulurin antuk surat keterangan sané jangkep.

Pawos 6

Wusan dados Krama Désa, luwiré :

- (1) Sangkaning :
 - ha. séda;
 - na. pinunas ngraga, menawi magingsir linggih saking wewengkon Désa Pakraman Tohjiwa;
 - ca. kanorayang, malantaran piwal ring Awig-awig miwah Pararem Krama Désa, utawi tan satinut ring pituduh Prajuru sajeroning indik nyupat sikian, minakadi nénten prasida ngeséhin prawretti.
- (2) Sang wusan dados Krama Désa tan polih pahpahan druwén Désa, sajawaning pahpahan sané mawit saking utsahan Banjar, miwah tan polih pasayuban malih sajeroning ala ayu.
- (3) Tata titiné niténin wusan dados Krama Désa inucap ring ajeng, kasulurang manut Pararem.

Pawos 7

Sahanan Krama Désa, patut keni tetegenan utawi ayah-ayah, luwiré :

- (1). Ayahan Ngarep, mapiteges paturunan, peson-peson miwah ayahan mamungkul saking Krama Ngarep.
- (2) Ayahan Balu, luwiré :
 - ha. Balu rémban, sané pianaknyané kantun alit-alit, punika keni ayahan balu rémban, sané kasulurang manut pararem;
 - na. Balu ngelintik, keni ayahan balu manut balunnyané, yan lanang keni ayahan lanang, yan istri keni ayahan istri.
- (3). Ritatkala ngardi wewangunan marep kabuatan Désa Pakraman, Kramané sajaba keni ayahan manut kecapé ring ajeng, taler keni paturunan sakadi ring sor :
 - ha. Paturunan sama wibhaga manut pararem;
 - na. Dana Punia, manut kalascaryan sang madana punia.

(4) Krama Desa, kadadosang :

- ha. Mapuankid utawi tan tedun ngayah / parum :
- 1) rikala mapawangunan, ngraabin, nangun yajnya, kaluwasan masengker déwasa;
 - 2) keni dedawuhan saking Guru Wisésa;
 - 3) kapialang, luwiré : sungkan, matepetin, kalayusekaran, lan sakancan punika.
- na. Dados ngwakilang ring jadma tiosan, sané sampun menék daa/truna.
- ca. Dados ngampel utawi numbas ayahan, pradé :
- 1). dados Pegawai Negeri utawi Pegawai Perusahaan Swasta;
 - 2). magenah ring désa séwosan malantaran ngrereh pakaryan.
- ra. Dados nyeledii utawi nyuksukin Krama Ngarep yan sampun mayusa 17 warsa.

Pawos 8

Kapatutan Krama Tamiu lan Tamiu :

- (1) Krama Tamiu lan Tamiu, patut madana punia ring Desa/Bañjar Pakraman, manut pararem.
- (2). Krama Tamiu lan Tamiu , patut polih pasayuban marupa pamitulung rikeñjekan katibén pañcabhaya.

Pawos 9

Paturunan miwah Leluputan :

- 1) Paturunan miwah peson-peson sajeroning ngulati kasukertan Desa Pakraman, kapitegenang ring Krama Desa /Banjar Pakraman.
- 2) Désa /Banjar Pakraman, wenang mawéh leluputan ayahan miwah peson-peson ring sang inggiling linggih miwah sang kawelasarsan.

- (3) Sor singgih leluputan miwah bacakan sang polih leluputan, kaunggahang jeroning Pararem.
- (4) Sajawaning Prajuru Desa Pakraman, sané taler pastika polih leluputan, luwiré :
 - ha. para sadhaka, minakadi Pamangku Kahyangan / Panyiwian Désa, lan panyada;
 - na. sang sungkan tahunan;
 - ca. wong cédāngga banget;
 - ra. wong ubuh mémé bapa, jantos mayusa 21 warsa.

Palet 2

Indik Prajuru Désa

Pawos 10

- (1) Désa Pakraman Tohjiwa, kaénter antuk Prajuru Désa Pakraman, kamanggala antuk Bendésa Adat.
- (2) Banjar kaénter antuk Prajuru Banjar, kamanggala antuk Kelihan Bañjar utawi Kelihan Adat.
- (3) * Bendesa Adat lan Kelihan Adat, patut :
 - ha. mawit saking Krama Ngarep utawi Pangelé;
 - na. kaadegang Prajuru malantaran antuk pamilihan jeroning Paruman Krama Désa/Bañjar Pakraman, nyabran 3 (limang) warsa, sajawaning wénten pariindikan tios, tur sang sampun puputing panumaya kéngin kapilih malih.
 - ca. maduluran atur piuning ring Pura Désa.

Pawos 11

(1) Bendésa Adat, karonbo antuk :

- ha. Panyadé, pinaka Wakil Bendésa Adat;
- na. Panyarikan, pinaka Juru Surat;
- ca. Patengen, pinaka Pangemong Druwén Désa;
- ra. Kasinoman, pinaka Juru Gumeñeang.

(2) Sajeroning ngénterang kasukertan ka niskala, Bendésa Adat, patut misinggihang Pamangku Kahyangan Désa.

Pawos 12

(1) Swadharmaning Bendésa Adat, luwiré :

- ha. Ngénterang paruman-paruman Désa Pakraman;
- na. Ngénterang panglaksanaan sadaging Awig-awig miwah pamutus-pamutus Krama Désa, sané sinanggeh Pararem;
- ca. Ngraksa miwah nudonang tata-titiné migunayang sarajabrana druwén Désa;
- ra. Nuntun saha ngénterang Krama Désa rawuhing warga Désa sami, ngupadi kasukertan sekala lan niskala;
- ka. Nuntun saha nyaksi upacara sangaskaraning kahuripan sané mabuat, minakadi sané ngilitang sulur pakulawargan;
- da. Nuntun saha ngénterang Warga Désa, nginggilang Sang Hyang Āgama, kasucian Kahyangan, kasucian Palemahan, kasucian Pawongan, miwah tata-titiné migunayang Sétra;
- ta. Mawosin miwah niwakang pamutus marep ring wicāran Warga Désa;
- sa. Ngwakilin Désa Pakraman, matemuang bebawos ring sapisira ugi;
- la. Lan sané séwosan sané wénten pakilitnya ring Désa Pakraman.

- (2) Tata-titiné nglaksanayang swadharma inucap ring ajeng, tan maren patut satinut ring daging Awig-awig, Pararem, dresta miwah Pamutus Paruman Krama Désa Pakraman
- (3) Panglaksanané ring ajeng patut kasiarang ring Désa / Banjar Pakraman, kapungkuripun
- (4) Sumakuta utawi sumanggup natak Pamutus Paruman Krama Désa Pakraman, ngeninin swadharman sowang-sowang Prajuru.

Pawos 13

Patias utawi olih-olihan Prajuru Désa Pakraman, luwiré :

- ha. luput reramon (peson-peson);
- na. luput paturunan marep ring kabuatan Désa/Banjar Pakraman;
- ca. polih pah-pahan sarin canang ritatkala wénten pujawali ring Kahyangan Désa, sané agengnya kasulurang manut pararem.

Pawos-14

- (1) Prajuru Désa Pakraman, kapilih nyabran 5 warsa, ngawit saking padéwasané kaadegang Prajuru Désa Pakraman.
- (2) Prajuru Désa Pakraman sané swadharmanya sampun puputing sengker, kéngin kapilih malih.
- (3) Pariindikané ngadegang Prajuru Désa Pakraman sakaluwiré, kapastikayang malarapan Paruman Krama Désa Pakraman tur kaingkupin antuk Krama.
- 4) Wusan dados Prajuru Désa Pakraman, sangkaning :
 - ha. lina;
 - na. pinunas ngraga malantaran jalaran sané pastika;
 - ca. swadharmanya sampun puputing sengker;
 - ra. kawusanang olih Krama Désa Désa.
 - ka. kawusanang/kanorayang olih Krama Désa, duaning iwang pamargi, menawi nilar sesana.

- (5) Ngentosin, ngwusanang utawi nganorayang Prajuru Désa Pakraman, patut kamargiang sajeroning Paruman Krama Désa Pakraman tur kaingkupin antuk pinih kedik kalih pah tiga saking gebogan Krama Désa sané rawuh.

Palet 3

Indik Kulkul

Pawos 15

- (1) Dudonan kulkul ring Désa Pakraman Tohjiwa, luwiré :
- ha. Kulkul Désa;
 - na. Kulkul Banjar/Témpékan;
 - ca. Kulkul Sekaa-sekaa.
- (2) Kulkul Désa / Bañjar Pakraman, kamanggehang pinaka piranti utawi sarana tengeran maka wangsit, ring wewengkon wewidangan Désa / Bañjar Pakraman.
- (3) Tetepakan suaran kulkul manut dresta, tur anggah-ungguh tetepakanipun kaunggahang jeroning Pararem :
- ha. Tengeran tedun ngayah, parum, tetepakannya : manut pararem;
 - na. Tengeran kalayusekaran, tetepakannya : manut pararem;
 - ca. Tengeran kapancabhayan, tetepakannya : manut pararem;
 - ra. Tengeran ngrorod, tetepakannya : manut pararem;
 - ka. Tengeran ngembasang oka, tetepakannya : manut pararem;
 - da. Tengeran wangdé ngayah, tetepakannya : manut pararem.

Pawos 16

- (1) Kulkul Désa / Banjar Pakraman, tan wenang katepak yan tan sangkaning pituduh Prajuru, sajawaning tengeran kapañcabhayan
- (2) Sang nepak Kulkul Désa / Banjar Pakraman, tan sangkaning pituduh Prajuru, patut digelis atur supéksa maka buatan panepaké, yan piwal, sang mamurug wenang katibakin danda, manut Pararem.
- (3) Kulkul Sekaa-sekaa miwah kulkul pondokan-pondokan, tan kalugra nyawerin utawi matchin sukat miwah tetepakan Kulkul Désa / Banjar Pakraman; pradé mamurug, sang mamurug taler wenang katibakin danda, manut Pararem.

Palet 4

Indik Paruman

Pawos 17

- (1) Dudonan Paruman ring Désa Pakraman Kambangan, wénten 5 soroh :
 - ha. Paruman Krama Désa, kawéntenang sanistannya apisan jeroning awarsa utawi manut kabuatan, sané karihinin antuk tetibak arah-arah.
 - na. Paruman Padgatakala, réhning wénten indik sané dahat mabuat sané pacang kabawosang, sané karihinin antuk tetibak arah-arah;
 - ca. Paruman Krama Bnnjar kawéntenang nyabran sasih, nénten majalaran arah-arah malih, duaning sowang-sowang Banjar, sampun madrebé tegak sangkepan sané pastika, manut pararem ring sowang-sowang Banjar.
 - ra. Paruman Prajuru, kawéntenang manut kabuatan;
 - ka. Paruman Sekaa-sekaa, kawéntenang manut kabuatan.

(2) Pamargin Paruman Désa / Banjar Pakraman, patut nganutin dudonan

- ha. Paruman wahu kengin kakawitin sasampuné katedunin antuk pinih kedik kalih pah tiga lintang adiri saking sang patut ngamiletin Paruman, kamanggala antuk tengeran suaran kulkul, mabusana adat Bali, tan kalugra makta gegawan sakaluwiré, karihinin antuk ngarjana Bhagawan Panyarikan, majalaran widhi widhana lan cané;
 - na. Maka pangawit, kalaksanayang panyacak pangesép, karuntutin antuk nyacak dedosan, wahu kalanturang antuk parum; sasampun parumané puput, patut kacacak malih, tur sané kasép, sang ninggal paruman miwah sané nosa, wenang katibakin danda, sané ageng alitipun, kasulurang manut Pararem;
 - ca. Maka pamastika wahu kengin nyacak pangesép, kasulurang manut Pararem;
 - ra. Sajeroning paruman tan kalugra ngwetuang wak ghora minakadi ngardi biota; sang mamurug, wenang keni pamidanda bea pacamil, sakadi dandaning anguman-uman ring paséban, sané kasulurang manut Pararem;
 - ka. Pamutus bebawos sané briuk sapanggul utawi ingkup, punika sané kaaptiang tur kamanggehang; pradé nénten prasida, pamutus bebawosé mangda kacumponin antuk pinih kedik kalih pah tiga lintang saking sang ngamiletin peparuman.
- (3) Pradé daging peparumané nénten kaingkupin, Prajuru Désa / Bañjar Pakraman mangda ngilikang bebawos, saha pamutusnya mangda kararemin antuk Krama Désa / Bañjar Pakraman, bilih jantos ping tiga taler nénten prasida kaingkupin, Prajuru Désa / Bañjar Pakraman wenang nunas bawos ring Majelis Désa Pakraman.

Pawos 18

- (1) Sajeroning Paruman Krama Désa, Bendésa Adat patut nyiarang pamarginé ngénterang Désa, pamekas ngeninin indik :
- ha. Muñjuk lungsuring gebogan pakraman saha ayah-ayahnyané, minakadi sulur arthabrana druwén Désa Pakraman;
 - na. Pangreñcanan Prajuru, ngeninin utsahan Désané kapungkur.

- (2) Pamutus Paruman Krama Désa sané sinanggeh Pararem, kamanggehang maka pamitegep panglaksanaan Awig-awig.

Pawos 19

- (1) Paruman Prajuru Désa Pakraman, kawenangang wantah ngrincikang pangreñcana marep ring utsahan Désané kapungkur.
- (2) Paruman Prajuru Désa Pakraman, tan kawenangang ngamedalang tetegenan ring Krama Désa, sadéréngé kaingkupin antuk Krama Désa.
- (3) Pamutus Paruman Prajuru / Kerta Désa, kéngin ngwetuang pasuara manut daging pituduh sang ngawa rāt, utawi ngonékang pamutus sané pecak sampun dados Pararem Krama Désa.

Palet 5

Indik Druwén Désa

Pawos 20

- (1) Sané kamanggehang dados druwén Désa Pakraman Tohjiwa, luwiré :
- ha. Kahyangan Désa, luwiré :
- 1). Kahyangan Tiga : Pura Désa, Pura Puseh, Pura Dalem;
- 2). Kahyangan druwén Désa séwosan ring Kahyangan Tiga, minakadi : Prajapti, Pura Melanting, Pura Pucak Bantas.
- na. Sétra;
- ca. Nyāsa lan Sasanti;
- ra. Lekita-lekita : Pipil utawi Sértipikat, Awig-awig, Pasuara, Pararem,
- ka. Gong abarung.

Olih-olihan Désa Pakraman Tohjiwa, mawit saking

ha. Paturunan saking Krama Désa.

na. Paica saking Guru Wisésa.

ca. Dana punia tiyosan sané patut.

Sanangken Paruman Krama Désa, Bendésa Adat patut nyiarang muñjuk lungsur olih-olihan lan sapanunggalannya sané sinanggeh druwen Désa.

Olih-olihan Désa Pakraman Tohjiwa, kaanggén prabéa piodalan miwah wewangunan ring pura, taler prabéa tiosan marep ring kabuatan Désa Pakraman.

Sakaluwiring druwen Désa patut wénten lekitannya sané pastika.

Tan kalugra ngadol utawi ngésahang druwen Désa yan tan kacumponin antuk Krama Désa sami.

Palet 6

Indik Panyanggran Banjar

Pawos 21

Krama Banjar ring wewengkon Desa Pakraman Tohjiwa patut sareng nyanggra karya suka duka sowang-sowang Krama Banjar.

Tetibak panyanggrané inucap ring ajeng, kasulurang manut Pararem.

Sowang-sowang Krama Banjar sané pacang nangun karya suka duka sané mabuat, mangda masadok ring Prajuru.

CATURTHAS SARGAH
SUKERTAN TATA AGAMA

Palet 1

Indik Déwa Yajnya.

Pawos 22

- (1) Kahyangan-kahyangan panyiwian Krama Désa Pakraman Tohjiwa, luwiré :
 - ha. Kahyangan Tiga : Pura Désa, Pura Puseh, Pura Dalem;
 - na. Kahyangan-kahyangan panyiwian Krama Désa tiosan ring Kahyangan Tiga : Prajapati, Pura Melanting, Pura Pucak Bantas.
- (2) Tegak piodalan ring sowang-sowang kahyangan inucap ring ajeng, kamanggehang sakadi ring sor puniki :
 - ha. Pura Désa, ring rahina Anggarakasih, Perangbakat;
 - na. Pura Puseh, ring rahina Purnamaning Sasih Kapat;
 - ca. Pura Dalem ring rahina Buda, Wagé, Langkir;
 - ra. Pura Melanting, ring rahina Saniscara, Kliwon, Wariga;
 - ka. Pura Pucak Bantas, ring rahina Buda, Umanis, Dukut.
 - da. Prajapati, ring rahina Buda, Wagé, Langkir.
- (3) Pamargin pangaciné ring sowang-sowang kahyangan ring ajeng, manut kecap sastra agama, saha kalaksanayang kanista, madhyama, utama, manut kawéntenan krama sané kaingkupin jeroning pararem.

Pawos 23

- (1) Ring sowang-sowang pura inucap ring ajeng, patut kaadegang Pamangku.
- (2) Pidabdabé ngadegang Pamangku, nganutin dudonan :
 - ha. ngwilang saking turunan utawi ngwaris;
 - na. malantaran nyanjan utawi nuhur ring pura sané karerehang Pamangku;
 - ca. malantaran kapilih antuk Krama Désa.

- (3) Sang tan wenang kaadegang dados Pamangku, luwiré :
 ha. cédangga, luwiré : péccéng, pérot, cingih lan sapanunggalannya,
 na. sapa sira ugi sané nénten kapatutang manut pararem;
 ca. nandang sakit ila, ayan, buduh miwah pinungkan sané tan
 kenéng tinamban;
 ra. sang maderbé parilaksana nénten becik.
- (4) Ngadegang lan nguwasanang Pamangku, kasulururang manut pararem.
- (5) Prabéa Kapamangkuan :
 ha. prabéa adiksa widhi utawi ngwintenang Pamangku, kamedalin miwah kalaksanayang antuk Krama Désa;
 na. marep ring prabéan pitra yajnya ring Pamangku, Panyadé, Serati, Sutri, yan séda ri wekas, Krama Désané patut mawéh dana punia atiwa-tiwa, manut Pararem.
- (6) Pamangku, patut ngamanggehang sesana miwah agem-ageman Pamangku.

Pawos 24

- Swadharmaning Pamangku :
 ha. ngénterang upacara piodalan ring kahyangan sané kaempon utawi ring pakubon sowang-sowang krama;
 na. pradé sinalih tunggil Pamangku kapialang utawi cuntaka, rikala piodalan ring pura sané kaempon, kéngin nyelang Pamangku tiosan, utawi nuhur sang sulinggih, katiténin antuk Prajuru;
 ca. yan Pamangku kalayusekaran, wenang anglepas swadharma, kasulurang manut Pararem;
 ra. yan Pamangku sampun tigang rahina ngayah ring pura sané kaempon, kancit wénten kulawaragannya kalayusekaran, Pamangku inucap tan kenéng cuntaka, sakéwanten nénten kengin budal salamin piodalan;
 ka. munggah tedun ring palinggih-palinggih Kahyangan Désa miwah ngiyasin pralingga-pralingga;
 da. ngrajegang sesanan Pamangku.

Pawos 25

Patias utawi olih-olihan Pamangku, luwiré .

- ha. panyolasan miwah sarin canang rikala muput yajnya ring sowang-sowang pakubon krama;
- na. Upon-upon palaba carik miwah tegal, manut pararem;
- ca. luput pakaryan miwah reramon;
- ra. polih apahtigan sarin canang rikala wénten aci ring kahyangan sané kaemponin;
- ka. luput saluwiring prabéan wewangunan ring kahyangan sané kaemong.

Pawos 26

(1) Pamangku kagentosin, riantukan :

- ha. séda;
- na. pinunas ngraga, menawi kageringan lan sapanunggilannya;
- ca. kawusanang antuk Krama, riantukan nilar sesanan Pamangku.

(2) Tatacarané ngadegang miwah ngentosin Pamangku, kasulurang manut Pararem.

Pawos 27

Indik kasukertan Kahyangan, kadudonang sakadi ring sor puniki :

(1) Sané nénten kalugra ngranjing ka Pura, luwiré :

- ha. Sang katiban cuntaka, minakadi sebel ngraga :
 - 1). sebel kandel ngrajaswala, salami dérèng mabresih;
 - 2). sebel antuk ngembasang putra, salami 42 rahina, pateh ring sang karuron;
 - 3). sebel panganténan, sadérèng mabiakala utawi makalakalaan;
 - 4). sebel riantukan kalayusekaran, jantos puputing sengker sané kaingkupin jeroning Pararem.

- na. Makta sahananing bebaktan sané sinanggeli ngletelin, manut kecap sastra agama
- ca. Sato agung minakadi wewalungan suku pat, sajawaning rikala mapepada
- ra. Anak alit sadérèng mayusa tigang sasih,
- ka. Mabusana sané tan manut kadi tatacaraning ngranjing ka pura, sadérèng polih wak-wakan utawi pituduh saking Prajuru Désa Pakraman.

(2) Tata busanané ngranjing ka pura, kasulurang manut Pararem.

(3) Pratingkahé tan wenang ring Pura, luwiré :

- ha. masumpah utawi macoran, sajawaning wit saking pituduh Prajuru Désa Pakraman;
- na. ngamedalang wak parusya utawi wak capala;
- ca. mabanyu, makoratan, masesenengan, makolem dados asiki lanang wadon, nyangsang busana;
- ra. ngias raga minakadi menahang wastra, menahang pusungan lan sakancan punika, sajawaning sang sulinggih miwah pinandita;
- ka. masusuin anak alit.

(4) Séwosan ring Pamangku tan kalugra munggah tedun ring palinggih-palinggih, sajawaning wit saking pituduh Prajuru Désa Pakraman.

(5) Sang mamurug kecapé ring ajeng, wenang keni déwa danda, manut pamutus Pararem.

Pawos 28

- (1) Yan wénten jadma karawuhan ring pura boya sangkaning nyanjan tur ngawinang kramané biapara, wenang keni déwa danda lan artha danda, sané kasulurang manut Pararem.
- (2) Pradé Kahyangan Désané kahanan durmanggala minakadi kapancabhayan, Pamangku patut digelis masadok ring Prajuru Désa Pakraman.
- (3) Indik upakara/upacara pamahayun kadurmanggalan Kahyangan Désa, mapagamel kecap sastra agama, sané kasungkemin olih Krama Désa.

Palet 2

Indik Resti Yajnya

Pawos 29

- (1) Sang pacang madeg sulinggih utawi madwijati patut masadok ring Prajuru Désa Pakraman miwah Parisada Hindu Dharma Indonesia.
- (2) Prajuru Désa Pakraman patut ngawas lan niténin tur wenang mialangin, pradé kacihnén wénten indik sané tan manut kecap sastra agama, tur sareng nyaksi upakara/upacara padwijatiannya, saha nglantur nyiarang sajeroning Paruman Krama Désa tegap rauhing wates kawenangannya muput yajnya.
- (3) Krama Désa patut madana punia sapamadeg miwah ring panglepas Sang Sulinggih riwekas, katuntun antuk Prajuru Désa.
- (4) Sang Sulinggih wenang polih leluputan ayahan miwah peson-peson.

Pawos 30

- (1) Sajeroning muput yajnya, Sang Sulinggih patut ngutamayang muput yajnya ring wewengkon Désa Pakraman Tohjiwa, sasampuné puput, wahu muput yajnya ring wewengkon désa tiosan utawi ka dura désa.
- (2) Krama Désané sami, patut sareng ngawas lan niténin katuntun antuk Prajuru, mangda sahanan yajnya sané kalaksanayang olih sowang-sowang Krama Désa, kapuput olih Sulinggih utawi Pinandita, manut kawenangannya sowang-sowang.

Palet 3

Indik Pitra Yajnya.

Pawos 31

Désa Pakraman Tohjiwa, patut sareng nyanggra yan wénten sinalih tunggil krama sané nglaksanayang upacara Pitra Yajnya.

(2) Tatacara panyanggrané mucap ring ajeng kasulurang manut Pararem

(3) Dudonan pamargin Pitra Yajnya

- ha. majalaran mendem utawi ngeseng, maka cihna makingsan ring Prèthiwi utawi makingsan ring geni, pinaka dharana antos nuptupang prabéa;
- na. majalaran upacara pangabénan utawi palebon;
- ca. riwusan ngabén, patut kalanturang malih antuk upacara ngrorasin (mamukur) tur karuntutin malih antuk nglinggihang déwa pitara.

Pawos 32

(1) Sinalih tunggil krama sané kalayusekaran/atiwa-tiwa, mangda masadok ring Prajuru.

(2) Swadharmaning Désa/Banjar :

- ha. Kelihan Adat, patut maritatas sang kaduhkitan, napiké sawané pacang kapendem, makingsan ring Geni utawi lantur kaabénang;
- na. Kelihan Adat raris nepak kulkul tengeran kalayusekaran;
- ca. Pradé kapendem, panyanggran Krama Banjar salanturnya manut sakadi sané sampun kaunggahang jeroning Pararem, jantos pependemané puput;
- ra. Pradé makingsan ring Geni, panyanggran Krama Banjar salanturnya, manut kadi daging Pararem, jantos pamargin upacarané puput;
- ka. Pradé kaabénang, panyanggran Krama Banjar salanturnya, manut kadi daging Pararem, jantos pamargin upacarané puput.

(3) Tan kalugra nginepang bangbang.

(4) Désané mawéh galah ring sang kalayusekaran sajeroning pitung rahina kengin atiwa-tiwa, sawawaning wénten kabuatan tios saking sang yajamana.

(5) Larangan pependeman miwah palebon ring wewengkon Désa Pakraman Tohjiwa : Semut Sedulur, Kala Gotongan, Was Pangantén, lan sapanunggalannya.

- (a) Pradé wénten kalayusekaran rikala prodalan ring Kahyangan Désa, kèngin mendem tan pasadok, tur patut ngreth galah mamargi rikala wengi

Pawos 33

- (1) Désa Pakraman Tohjiwa, ngamangehang indik cuntaka, mapagamel ring Pamutus Mahasabha Parisada Hindu Dharma Indonésia.
- (2) Tatacarané nyulurang kacuntakan, mapagamel kecap sastra agama, kaanutang ring drestan désa, sané kaingkupin jeroning Pararem.
- (3) Sinalih tunggil krama sané kahanan cuntaka, yan durung utas, tan kalugra nyarubin genah suci druwen Désa miwah druwen sowang-sowang krama.
- (4) Sang mamurug, patut keni déwa danda, manut Pararem..
- (5) Sengker utas cuntaka manut kawéntenannya, kasulurang sakadi ring sor puniki :
 - ha. Kalayusekaran, cuntakannya kaanutang ring drestan désa miwah sastra dresta;
 - na. Ngrajaswala, cuntakannya tigang rahina ngawit saking ngrajaswala, utawi salamin ngrajaswala;
 - ca. Ngembasang putra, abulan pitung rahina ngawit saking putrané embas, ngantos katiwakin upakara/upacara tutug kambuhan;
 - ra. Karuron, cuntakannya abulan pitung rahina ngawit saking karuron, ngantos katiwakin tirtha pamrayascitta;
 - ka. Pawiwahan, cuntakannya ngantos sampun makala-kalaan;
 - da. Gamia gamana, cuntakannya ngantos sampun kapalasang, karuntutin antuk mrayascitta sikian, Désa Pakraman miwah Kahyangan Désa;
 - ta. Salah timpal, cuntakannya kapuputang manut kecap sastra agama miwah drestan désa;
 - sa. Anak istri mobot malantaran lokika sanggraha kandugi nénten katiwakin upakara/upacara pabiakawonan, cuntakannya ngantos katiwakin upakara/upacara pabiakawonan;

wa. Anak istri ngembasang putra malantaran lokika sanggraha kandugi pecak nénten katiwakin upakara/upacara pabiakawonan miwah widhi widhana, cuntakannya ngantos wénten meras anaké alit, karuntutin antuk upakara/upacara manut kecap sastra agama;

la. Mamitra ngalang, cuntakannya ngantos katiwakin upakara/upacara pabiakawonan;

ma. Şaḍ ātatāyī, cuntakannya ngantos sampun mrayascitta sikian miwah ngeséhin prawreti.

(6) Cuntaka kalayusekaran/kapademan :

ha. Kapendem, cuntakannya :

1). cuntaka ka Banjar, laminipun tigang rahina ngawit saking wusan mendem, ngantos sampun maprayascitta (masepuh);

2). kulawargannya sajeroning pakarangan ngantos 12 rahina.

na. Kaabénang, cuntakannya :

1). cuntaka ka Banjar, manut dresta minakadi ngabén nglanus arahina, sané kapikukuh antuk Pararem;

2). cuntakan sang nyambut karya pitra yajnya, ngawit saking mapakéling, jantos yajnyané puput (mapapegat).

7) Sang katiban cuntaka, luwiré :

ha. Kalayusekaran, sané cuntaka :

1). sang kalayusekaran;

2). kulawargannya;

3). bebanjarannya;

- na. Ngrajaswala, sané cuntaka : sang ngrajaswala punika.
 - ca. Ngembasang putra, sané cuntaka : sang maderbé putra lanang wiadin istri, utawi yayah rénan sang wahu embas.
 - ra. Pawiwahan, sané cuntaka : sang mawiwaha lanang wiadin istri, utawi dampati lanang istri;
 - ka. Karuron, sané cuntaka : sang karuron rawuhing lanangnyané;
 - da. Gamia gamana, sané cuntaka :
 - 1). sang nglaksanayang gamia gamana;
 - 2). Désa Pakramannyané;
 - ta. Salah timpal, sané cuntaka :
 - 1). sang nglaksanayang salah timpal;
 - 2). Désa Pakramannyané;
 - sa. Anak istri mobot malantaran lokika sanggraha kandugi pecak nénten katiwakin upakara/upacara pabiakawonan, sané cuntaka : anaké istri sané mobot punika;
 - wa. Anak istri ngembasang putra malantaran lokika sanggraha kandugi pecak nénten katiwakin upakara/upacara pabiakawonan miwah widhi widhana, sané cuntaka :
 - 1). sang ngembasang putra;
 - 2). putrané sané kaembasang;
 - la. Mamitra ngalang, sané cuntaka : sang nglaksanayang mamitra ngalang punika;
 - ma. Şad ātatāyī, sané cuntaka : sang nglaksanayang şad ātatāyī punika.
- 3) Sang tan kenéng cuntaka, luwiré :
- ha. Sang Sulinggih;
 - na. Pamangku Kahyangan Tiga rikala piodalan tur sampun ngayah tigang rahina ring pura sané kaemponin utawi sampun ngalang sasih utawi ngalang tengah.

Pawos 34

- (1) Pamargin atiwa-tiwa utawi pangabénan kalaksanayang mapagamel kecap sastra agama miwah drestan désa.
- (2) Peputusan pangabénan, kasulurang manut Pararem.
- (3) Panginguné ring Krama Banjar, kasulurang manut Pararem

Palet 4

Indik Manusa Yajnya.

Pawos 35

- (1) Krama Désa minakadi Krama Banjar, patut sareng nyanggra miwah niténin yan wénten sinalih tunggil krama nglaksanayang upacara Manusa Yajnya sané mabuat.
- (2) Tatacara panyanggrané inucap ring ajeng kasulurang manut Pararem.
- (3) Sang pacang nglaksanayang upacara Manusa Yajnya sané mabuat, mangda masadok ring Prajuru.
- (4) Manusa Yajnya inggih punika, upacara-upacara dharmaning kahuripan manusa, ngawit saking patemoning kama bang lan kama petak sajeroning garbha, ngantos kalayusekaran ri wekas.
- (5) Upacara-upacara inucap ring ajeng kamargiang kanista, madhyama, utama, manut kecap sastra agama miwah dresta.

Palet 5

Indik Bhuta Yajnya.

Pawos 36

- (1) Désa Pakraman Tohjiwa patut nyanggra pamargin Bhuta Yajnya, marep ring kabuatan Désa Pakraman Tohjiwa.
- (2) Pidabdab pamargin Bhuta Yajnya inucap ring ajeng, mapagame kecap sastra agama, kaanutang ring drestan Désa, sané kapikukul antuk Pararem.

- (3) Krama Désa minakadi Krama Banjar patut sareng nyanggra yan wnten sinalih tunggal krama sané nglaksanayang upacara Bhuta Yajnya sané mabuat.
- (4) Sang pacang nglaksanayang upacara Bhuta Yajnya sané mabuat, mangda masadok ring Prajuru.

Pawos 37

- (1) Bhuta Yajnya marep ring kabuatan Désa Pakraman minakadi carun sasih miwah sané lianan, kasulurang manut Pararem.
- (2) Indik pamargin palelastian utawi makiyis, kasulurang manut Pararem.
- (3) Nangken warsa, rikalaning Tilem Sasih Kasanga, patut kalaksanayang Tawur Kasanga, kalanturang antuk Pangrupukan, pinaka cihna nyanggra pangrawuh Nawa Saka Warsa (Tahun Baru Saka), ring pananggal apisan Sasih Kadasa, sané kawastanin Nyepi.
- (4) Rikalaning Nyepi, sowang-sowang Krama Désa patut ngamargiang Catur Brata Panyepian, inggih punika :

ha.	amati geni	:	tan kéngin maapi-api;
na.	amati karya	:	tan kéngin nyambut karya;
ca.	amati lelungan	:	tan kéngin malelungayan mrika-mriki;
ra.	amati lelangwan	:	tan kéngin maoneng-onengan, ngwijil ang suara ghora, nabuh gegambelan, lan sakancannya.
- 5) Catur Brata Panyepian punika kamargiang saking semeng jantos Bénjangné ngedas rahina.
-) Mangda pamargin Catur Brata Panyepian punika trepti, patut katilikin antuk tetelik Désa sané kawastanin Pacalang Désa, tur sang mamurug patut katiwakin pamidanda, sané kasulurang manut Pararem.
- 1 Bénjangné ring pananggal ping kalih Sasih Kadasa, kawastanin Ngembak Geni, sowang-sowang krama patut saling ngaksamayang sané kawastanin Dharma Santi.

PANCAMAS SARGAH
SUKERTAN TATA PAWONGAN

Palet 1

Indik Pawiwahan.

Pawos 38

- (1) Krama Désa minakadi Krama Banjar, patut sareng nyanggra miwah niténin yan wénten sinalih tunggil krama sané nglaksanayang upacara Pawiwahan.
- (2) Pamargin Pawiwahan, luwiré :
 - ha. malantaran pepadikan;
 - na. malantaran ngrorod, marangkat rihin wahu kakrunayang;
 - ca. malantaran nyentana utawi nyentana nyeburin.
- (3) Indik Pawiwahan, Désa Pakraman Tohjiwa ngamanggehang Undang-Undang miwah Peraturan Pemerintah , indik Pawiwahan.
- (4) Tatacara panglaksanannya, mapagamel kecap sastra agama, kaanutang ring drestan Désa, sané kapikukuh jeroning Pararem.
- (5) Sinalih tunggil krama sané pacang nglaksanayang upacara Pawiwahan, mangda masadok ring Prajuru.

Palet 2

Indik Nyapihan.

Pawos 39

- 1) Prajuru Désa minakadi Prajuru Banjar Pakraman, wenang sareng mawosin miwah niténin yan wénten sinalih tunggil krama sané mapikarsa pacang palas marabi, mangda nénten kadurusan dados Nyapihan.

- (2) Yan krama inucap kukuh ring pikarsannya, Désa minakadi Banjar Pakraman, nénten sumakuta ring pamarginnya.
- (3) Sadéréngé pastika polih pamutus saking sang ngawawenang minakadi Sang Rumawos (Pengadilan Negeri), krama inucap manggeh keni tetegenan krama sakadi nguni.

Palet 3

Indik Sentana

Pawos 40

- (1) Prajuru minakadi Prajuru Banjar, wenang sareng mawosin miwah niténin yan wénten sinalih tunggil krama sané ngindikang sentana.
- (2) Indik Sentana, Désa Pakraman Tohjiwa ngamanggehang uger-uger jagat minakadi kawicaksanan sang maraga Guru Wisésa, kaanutang ring drestan Désa, sané kapikukuh antuk pararem.
- (3) Sang pacang ngrajegang sentana, mangda masadok ring Prajuru.

Palet 4

Indik Warisan

Pawos 41

- (1) Prajuru Désa minakadi Prajuru Banjar, wenang sareng mawosin miwah niténin yan wénten sinalih tunggil krama sané ngindikang warisan.
- (2) Indik Warisan, Désa Pakraman Tohjiwa ngamanggehang uger-uger jagat minakadi kawicaksanan sang maraga Guru Wisésa, kaanutang ring drestan désa, sané kapikukuh antuk pararem.
- (3) Sang pacang ngindikang warisan, mangda masadok ring Prajuru.

SASTRAS SARGAH
SUKERTAN TATA PALEMAHAN

Palet 1

Indik Karang, Tegal, lan Carik.

Pawos 42

- (1) Krama Desa sané ngamong Karang Désa utawi karang pumahan ngraga, patut ngwatesin karangnya sowang- sowang antuk pagehan / turus utawi témbok, mangda pakantenannya asri.
- (2) Watesé sané mawasta gegaleng kaluan miwah gegaleng katebén mangda nganutin dresta, tur kakaryanin olih sang negen wates inucap.
- (3) Pradé karasayang pagehan / turus inucap nglikadin, yan pada arsa panyandingé, watesé kéngin nganggén pinget utawi praciha pal saking Agraria, sakéwanten kasaksi antuk Prajuru Désa / Banjar.
- (4) Pradé wénten karang kabebeng, mangda kausahayang wénten pamesuannya sané pastika.

Pawos 43

- 1) Sinalih tunggil Krama Désa / Banjar, nénten kalugra :
 - ha. Ngalah-alah margi, Karang Désa, tegal ayahan désa, tegal / carik krama liyan, lan sakancan punika;
 - na. Ngalah-alah tegak kahyangan, sétra lan sakancan tegak sané sinanggeh suci.
-) Pradé wénten mamurug kecapé ring ajeng, sang mamurug, patut ngwaliang tanah inucap, tur sang ngalah-alah tegak suci, tiosan ring ngwaliang tanah tegak suci inucap, taler patut karuntutin antuk déwa danda miwah artha danda, sané kasulurang manut Pararem.

- (1) Ngawit nandur pepayonan minakadi tanem tuwuh, patut adepa agung ngajeroang saking wates; pepayonan minakadi tanem tuwuh sané jantos ngliwat wates, wenang kasepatgantungin.
- (2) Pepayonan sané ngungkuli mawastu mayanin ka pisaga, sang nruwénang pepayonan inucap patut kawara tur kairing mapiguman antuk sang rumasa katetehan, bilih-bilih sang nruwénang arsa ngrebah utawi notor wit pepayonané punika.
- (3) Pradéné sampun kawara taler tan wénten utsahan sang nruwénang, sang rumasa katetehan wenang masadok ring Prajuru, tur risampuné kaparitas kandugi wénten lelugrahan Prajuru, wahu wit pepayonané punika kéngin karebah, sakéwanten panukun patin wit pepayonané punika patut katahur olih sang rumasa katetehan manut panglokikan sang nepasin, tur wit pepayonané sané karebah punika, kasukserah ring sang nruwénang.
- (4) Sang patut keni pamidanda panyangaskara saha prabéa manut pararem, marep ring wewangunan sang karubuhan, luwiré :
ha. sang nruwénang wit pepayonan sané sinanggeh mayanin, pradé pungkut padidi tur ngrubuhin wewangunan krama tiosan;
na. sang notor, monggol utawi ngrebah taru, tur ngrubuhin wewangunan krama tiosan.
- (5) Krama Désa patut ngamanggehang kawredian tanem tuwuh sané ngawinang Désané asri tur lestari sané kawastanin Bhutahita, sané mateges kalestarian lingkungan hidup.
- (6) Sinalih tunggil krama sané pacang ngrebah pepayonan minakadi tanem tuwuh sané ngawinang Désané asri tur lestari, patut masadok tur nunas lelugrahan ring Prajuru Désa Pakraman.

Palet 3

Indik Wewangunan

Pawos 45

- (1) Nangkén ngwangun, sowang-sowang krama patut :
 - ha. masadok ring Prajuru, pamekas marep ring wewangunan sané mapanyaitan minakadi menengin wates;
 - na. nganggé Aṣṭa Bhumi miwah gegulak Aṣṭa Kośali, sanistannya manut ring patitisé ka niskala.
- (2) Pradé wewangunané jantos nyayubin ka pisaga, bilih-bilih témboké ring telenging wates, risampuné kawara tur kairing mapiguman taler tan wénten utsahan sang nruwénang, kangkat kasadokang ring Prajuru; sasampuné kaparitasas tur wénten lelugrahan Prajuru, sang nruwénang wewangunan wenang keni danda manut Pararem, tur témbok inucap patut kagubar olih sang nruwénang, sanistannya mangda kakaryanang abangan.

Palet 4

Indik Wewalungan

Pawos 46

- (1) Sahanan warga désa sané miara wewalungan : bawi, banténg lan sakancan punika, mangda sayaga niténin negul minakadi nglogor wewalungannya, mangda nénten ngrusak karang utawi pabianan krama tiosan, bilih-bilih jantos ngranjing ngletehin kahyangan.
- (2) Pradé wénten wewalungan malumbar utawi ngeléb tur ngrusak karang utawi pabianan krama séwosan, risampuné kawara taler nénten wénten utsahan sang nruwénang, yan wewalungan punika malih ngrusak karang utawi pabianan krama séwosan, wewalungan punika kéngin kataban, tur sang nruwénang wenang katibakin danda ngwaliang panukun wit tetandurané sané karusak, saha nahur panebas pepiaran tetabanan, manut panglokikan Prajuru Désa / Banjar Pakraman.

- (3) Pradé wénten wewalungan ngranjing jantos ngletchin genah suci, minakadi kahyangan, panrajan lan sakancan punika, risampuné kaparitats antuk Prajuru, sang mruwénang wewalungan inucap wenang keni déwa danda lan artha danda, agung alitipun manut kecap sastra agama, sané kapikukuh antuk Krama Désa / Krama Banjar Pakraman.
- (4) Krama Désa patut nyerayanin wewalungan miwah sarwa prani, tan kapatutang mademang paksi, nuba ulam lan sakancan punika, pinaka sinalih tunggil utsahan Krama Désa ngardi Bhutahita.
- (5) Sang mamurug kecapé ring ajeng, wenang keni danda manut Pararem.

Palet 5

Indik B h a y a

Pawos 47

- (1) Bacakan bhaya luwiré : jiwabhaya, arthabhaya, agnibhaya, toyabhaya, lindubhaya, lan sakancan punika sané ketahipun kawastanin pancabhaya.
- (2) Sinalih tunggil krama sané manggihin prasihna pastika wéntené sahanan pancabhaya, patut digelis nepak kulkul tengeran kapancabhayan, tur digelis masadok ring Prajuru.
- (3) Pradé désané kahanan jiwabhaya, Krama Désané patut ngaturang upacara pamahayun désa manut kecap sastra agama sané kapikukuh antuk krama, tur sang ngwetuang jiwabhaya, katur ring sang ngawawenang.

- (1) Sinalih tunggil krama sané manggihin prasihna pastika wéntené arthabhaya (kamalingan), patut digelis nepak kulkul tenggeran pamitulung manut pawos 15 (3) utawi pawos 16 (1); sang kamalingan patut digelis atur supéksa ring Prajuru; sang kacihnan ngamalingan katur ring sang ngawawenang, maweweh malih patut keni déwa danda lan artha danda manut Pararem, yan ipun ngamaling barang druwen désa sané sinanggeh suci.
- (2) Sowang-sowang Krama Désa tan kapatutang mapailonan ring dusta; sang kacihnan mapailonan ring dusta patut katibakin danda kadi dandaning maling, sané kasulurang manut Pararem.
- (3) Indik ngrereh reramon minakadi daun kelapa, ron, miwah sané séwosan ring pabianan krama tiosan ri kenjekan suwung, kasulurang manut Pararem.
- (4) Indik ngranjingin pakubon utawi pakarangan krama séwosan rikala suwung, mawastu raris sang maderbé pakubon utawi pakarangan punika kaicalan, kasulurang manut Pararem.
- (5) Indik ngranjingin pakubon utawi pakarangan krama séwosan rikala suwung riantukan wénten pisarat sané mabuat minakadi mapangarah miwah kabuatan sané liyanan, kasulurang manut Pararem.

SAPTAMAS SARGAH

WICARA LAN PAMIDANDA

Palet 1

Indik Wicara

Pawos 49

- (1) Sané wenang mawosin wicara ring wewengkon Désa Pakraman Toljiwa, inggih punika Prajuru Désa maka miwah Paruman Krama Désa.
- (2) Pradé sang mawicara tan cumpu ring Pamutus Paruman Krama Désa, kengin nunasang ring Sang Rumawos utawi Pengadilan Negeri.
- (3) Sahanan wicara sané mawit saking kacorahan sakaluwuré sané sinanggeh nungkasin daging Awig-awig, Pasuara miwah Pararem Désa / Banjar Pakraman, patut digelis kabawosin olih Prajuru, nénten nyantos pasadok malih.
- (4) Sajaba wicara sakadi ring ajeng, patut nyantosin pasadok sang nunas bawos.
- (5) Panepasé mangda pastika nyantenang iwang patut malarapan Tripramana, inggih punika : saksi, likita, bukti, tur panepasé tan maren nepék ring Catur Dresta.

Palet 2

Indik Pamidanda.

Pawos 50

- (1) Désa/Banjaré, wenang nibakang pamidanda ring Warga Désa / Banjar sané sisip.
- (2) Tetibak pamidanda inucap ring ajeng, kalaksanayang olih Prajuru.
- (3) Bacakan pamidanda, luwuré :
 - ha. ayahan panukun kasisipan;
 - na. artha danda saha panikelnya, miwah panikel paturunan;
 - ca. karampag;
 - ra. kanorayang;
 - ka. kawusanang makrama Désa tur sang nglinggihin Karang Désa pipil karang ayahannya kawaliang ring Désa Pakraman;
 - da. panyangaskara.
- (4) Pamidanda sané katiwakang patut masor singgih, manut kasisipan.
- (5) Jinah utawi arthabrana pamidanda, ngranjing dados druwén Désa Pakraman.

Pawos 51

- (1) Krama sané langkungan ring tigang paruman nglantur nénten nahur paturunan miwah dedandan, wenang karampag.
- (2) Tetibak pangrampagagan, nganutin tatacara sakadi ring sor puniki :
 - ha. Kalaksanayang olih Prajuru, kasarengin antuk krama pinih akéh tigang diri, maka saksi;
 - na. Sang ngrampag patut madarsana rikala ngambil barang minakadi nyawénin tanem tuwuh, sané ageng pangargannyané manut ring utang sang karampag;
 - ca. Prajuru patut miteketang mangda barang-barang sané karampag punika digelis katebus masengker awuku, tur ring rahinané kaping kutus pacang kalélang utawi kaadol ring ajeng Krama Désa Pakraman;
 - ra. Tan kéngin ngrampag saluwiring barang sané patut inggilang manut sastra agama, miwah mademang pangupajiwana sang karampag.

Pawos 52

- (1) Pradé sang pacang karampag mialangin pamargin pangrampagan inucap, mawastu sampun tan nganutin linging Awig-awig, krama inucap wenang kanorayang.
- (2) Yan krama inucap manggeh piwal yadiastun sajeroning makudang-kudang paruman sampun kawéhin patinget sakéwanten manggeh piwal, tan wénten pamargi séwos, sajawaning krama inucap kawusanang makrama Désa/Banjar, tur sang nglinggihin Karang Désa, pipil karang ayahannya kawaliang ring Désa Pakraman.
- (3) Pangrampagan inucap ring ajeng kabawos buntas, risampun sang keni pangrampagan punika :
 - ha. Nunas geng rena sinampura ring ajeng Krama Désa/Banjar Pakraman, riantukan piwal ring pasubaya sané pecak sampun kararemin;
 - na. Nahur pangargan panguwak pasubaya sadaweg pacang karampag, kadulurin antuk prayascitta.

ASTAMAS SARGAH
NGUWAH-UWUHH AWIG-AWIG

Pawos 53

- (1) Nguwah-uwuhin Awig-awig Désa Pakraman puniki, wantah kéngin kalaksanayang antuk Paruman Krama Désa.
- (2) Pakarsané nguwah-uwuhin punika, mangda mawit saking pakarsan Krama Désa, yadiastun kamedalang antuk sinalih tunggil Prajuru, utawi sinarengan.

Pawos 54

- (1) Sakaluwiring indik sané sampun wénten sadéréng awig-awig puniki kasurat, mangda kaanutang ring sadaging awig-awig puniki.
- (2) Sakaluwir sané durung kasurat sajeroning awig-awig puniki, menawi kangkat kanggén mitegepin awig-awig puniki, pacang kasurat jeroning Pararem.

NAWAMAS SARGAH

SAMĀPTA

Pawos 55

- (1) Awig-awig puniki kawastanin Awig-awig Désa Pakraman Tohjiwa.
- (2) Awig-awig puniki kamargiang ngawit saking kaingkupin utawi kararemin.

Pawos 56

- (1) Awig-awig puniki kararemin duk rahina Saniscara, Kliwon, wuku Wayang, pananggal ping 15 Sasih Karo, Sakawarsa 1920, tanggal 8 Agustus 1998, magenag ring Balé Banjar Pakraman Tohjiwa.
- (2) Awig-awig puniki kalinggatanganin antuk Bendesa Adat miwah oli sang ngawawenang manut kawenangannya sowang-sowang, tur kapikukuh antuk Murdhaning Pamikukuh : Bupati Tabanan.
- (3) Register Nomor : 03 Tahun 1998.

Luwir sang nglinggatanin :



Adat Tohjiwa

WAYAN WIDHI

1.



Kepala Desa Antapani

AA. GEDE DALENTISNA NEURAH

Saksi saksi :



PHDI Kecamatan Baturiti

DR. I Wayan Purnayasa

3.



Baturiti

DRS. I M. SAYUN

Kawikanin olin

1. Ketua BPPLA Kabupaten Tabanan



DRS. I WAYAN DJAPA



PHDI Kabupaten

DRS. I MADE SAMBA

3. Kepala Kantor Departemen Agama
Kabupaten Tabanan.



DRS. I MADE RADA LEGAWA

MURDHANING PAMIKUKUH,
BUPATI KEPALA DAERAH TINGKAT II TABANAN



KOMANG WIJANA

LEPIHAN

TEFINASAN NYĀSA LAN SASANTI DESA PAKRAMAN TOHJIWA

- (1) Sibeh Bucu Lima, mateges : Desa Pakraman Tohjiwa mpikukuh antuk Pancasila pinaka Dasar miwah Darsanan Jagat Republik Indonesia.
- (2) Swastika jeroning Padma Astadala :
 - na. Swastika, mateges : Krama Désa Pakraman Tohjiwa, nginggilang miwah nyungkemin Agama Hindu.
 - na. Padma Astadala, meteges :
 - 1). Krama Désa Pakraman Tohjiwa, misinggihang Aṣṭa Aiśwaryan Ida Sang Hyang Widhi, inggih punika : Aṇimā, Laghimā, Mahimā, Prāpti, Prakāmya, Īsitwa, Waśitwa, miwah Yatrakāmāwasayitwa;
 - 2). Sajeroning ngupadi patitis Désa Pakraman Tohjiwa, Prajuru Désa Pakraman Tohjiwa, mapagamel antuk Aṣṭa Brata, inggih punika : Indra Brata, Sūrya Brata, Candra Brata, Yama Brata, Bāyu Brata, Kuwéra Brata, Agni Brata, miwah Baruṇa Brata.
- (3) Gunung utawi Linggācala, mateges : Gunung wantah linggan ida Sang Hyang Śiwa, punika ngawinang gunung rawuhing alasipun patut pisan suciang, tan dados kalasak sakama-kama, mangda jagaté nénten kirangan toya.
- (4) Padi lan Kapas, mateges : Sajeroning ngupadi jagaddhita sané matiti pangancan antuk Dharma, Artha, Kama, Krama Désa Pakraman Tohjiwa, tan mari ngawrediang tri bhoga, inggih punika : bhoga, upabhoga, maka miwah paribhoga.

(5) Pinggel kekalih sambung sinambung. mateges : Sajeroning midabdadabin kawéntenan Désa Pakraman Tohjiwa, tan dados pasahang saking gegulak Rwa Wlinéda

(6) Méru Tumpang Tiga, mateges : Krama Désa Pakraman Tohjiwa nginggilang miwah misinggihang Sang Hyang Tri Murti, sané kasthanayang ring Pura Désa, Pura Puseh miwah Pura Dalem

(4) Sasanti : Tiling Ambek Dharma Karya, mateges : Krama Désa Pakraman Tohjiwa, tan mari ngulengang manah sajeroning ngamarmiing pakaryan sané matiti pangancan antuk dharma, maka buatan ngupadi kasukertan Désa Pakraman Tohjiwa sekala niskala.